




Reykjavíkurborg  
Fjármálaskrifstofa



R16020248  
7. mars 2016

## Umsögn

**Efni:** Bréf Tónlistarskóla FÍH dags. 26. febrúar 2016  
**Viðtakandi:** Borgarráð  
**Sendandi:** Fjármálastjóri

Fyrir borgarráði liggur bréf Tónlistarskóla FÍH dags. 26. febrúar 2016, þar sem fjallað er áhrif nýgerðs kjarasamnings á milli Félags íslenskra hljómlistarmanna og Sambands íslenskra sveitarfélaga. Í bréfinu er þeirri spurningu beint til borgarráðs „hvort Reykjavíkurborg hafi í hyggju að uppfyllan þennan kjarasamning, sem borgin er aðili að, hvað varðar launahækkanir til þeirra kennara sem kenna nemendum á mið- og framhaldsstigi í söng og framhaldsstigi í hljóðfæraleik.“

Reykjavíkurborg er ekki vinnuveitandi starfsmanna Tónlistarskóla FÍH og ber þannig ekki ábyrgð á starfskjörum starfsmanna skólans. Hins vegar er Reykjavíkurborg í samningssambandi við skólann í gegnum þjónustusamning vegna reykvískra nemenda í grunn- og miðnámi í hljóðfæraleik og grunnnámi í söng. Í þeim samningi er fjallað um hvernig tekið skuli á málum vegna endurskoðunar kjarasamninga tónlistarskólakennara.

Með samkomulaginu um eflingu tónlistarnáms frá 13. maí 2011 tók íslenska ríkið á sig skyldu um að greiða árlegt framlag til Jöfnunarsjóðs sveitarfélaga sem ætlað var að standa straum af kennslukostnaði í tónlistarskólum vegna hljóðfæranáms á framhaldsstigi og söngnáms á mið og framhaldsstigi og tengdum kostnaði. Lögum nr. 75/1985 var í kjölfarið breytt til bráðabirgða framangreindu til staðfestingar. Með samkomulaginu voru tryggðir fjármunir á landsvísu vegna nemenda í grunn- og miðnámi í söng og framhaldsnámi í hljóðfæraleik. Kemur Reykjavíkurborg að þeirri fjármögnun með því að taka að sér hlutdeild í skilgreindum verkefnum ríkisins og með aukaframlögum sem borgarstjórn hefur samþykkt. Jöfnunarsjóður skiptir þeim fjármunum sem koma frá ríkinu eftir reglum sem hann setur. Aðkoma og ábyrgð borgarinnar á fjármögnun þessa náms afmarkast við ákveðnar fjárhæðir sem samþykktar eru í fjárhagsáætlun borgarinnar líkt og framlög ríkisins til þessa verkefnis. Í niðurstöðu héraðsdóms nýverið í máli Tónlistarskólans í Reykjavík gegn Reykjavíkurborg er þessi ákvörðun og fjárstjórnarvald borgarstjórnar ekki véfengt.

Birgir Björn Sigurjónsson,  
fjármálastjóri

TÓNLISTARSKÓLI

**FÍH**

Raudagerði 27 108 Reykjavík K.t. 490680 - 0129 Sími : 5888956 Fax :5888215

Málsnr.: 216020248  
Skjalasafn Ráðhúss  
01. mars 2016  
Bréfalykill: 13310

Til Borgarráðs Reykjavíkur.

Reykjavík 26. febrúar 2016


Þann 16. febrúar sl. gerðu Félag íslenskra hljómlistarmanna og Samband íslenskra sveitarfélaga með sér nýjan kjarasamning um störf tónlistarkennara í tónlistarskólum landsins. Gildistími þessa samnings er frá 1. ágúst 2015 til 31. mars 2019. Það er ljóst að launahækkunar þeirra kennara sem þiggja laun samkvæmt þessum samningi eru verulegar og munu auka enn á vandræði þeirra skóla í Reykjavík sem flesta nemendur hafa á mið- og framhaldsstigi í söng og framhaldsstigi í hljóðfærleik, ef ekki fylgja samningnum framlög vegna hækkana á launum kennara fyrir kennslu á öllum stigum. Þess ber að geta að fulltrúi Reykjavíkurborgar átti sæti í samninganefnd Sambands íslenskra sveitarfélaga.

Eftir síðustu kjarasamninga varð raunin sú hér í Reykjavík að engin aukning varð á framlögum til kennslu á mið- og framhaldsstigi í söng og framhaldsstigi í hljóðfærleik þó samið væri um launahækkunar fyrir kennslu á öllum stigum.

Ég vil fyrir hönd Tónlistarskóla FÍH beina þeirri spurningu til Borgarráðs hvort Reykjavíkurborg hafi í hyggju að standa við gerðan kjarasamning, sem borgin er aðili að, hvað varðar launahækkunar til þeirra kennara sem kenna nemendum á mið- og framhaldsstigi í söng og framhaldsstigi í hljóðfærleik. Þá er einnig alveg ljóst að ef borgaryfirvöld auka ekki framlag sitt til Tónlistarskóla FÍH í samræmi við launahækkunar kjarasamnings, til viðbótar við það sem ríkið leggur til þessa málaflokks í gegnum Jöfnunarsjóð, mun kennsla leggjast af við skólann á öllum námsstigum. Það mun hafa í för með sér að eina stofnunin sem hefur sinnt kennslu í hryntónlist á Íslandi fram til þessa mun hætta rekstri.

Að lokum spyr ég því Borgarráð hvort það sé stefna Reykjavíkurborgar að tónlistarkennsla verði aflögð í Reykjavík frá næsta hausti hvað varðar framhaldsmenntun í hryntónlist?

Ég fer fram á að þessi fyrirspurn verði tekin fyrir á fundi Borgarráðs 3. mars nk.

Með kveðju,  


Björn Th. Arnason

Skólastjóri Tónlistarskóla FÍH

Afrit sent borgarstjóra Degi B. Eggertssyni